

---

*Til ökutækjaleiga vegna nýrrar löggjafar á sviði ferðamála.*

---

## **Þann 1. janúar nk. taka gildi ný lög um Ferðamálastofu nr. [96/2018](#) og lög um pakkaferðir og samtengda ferðatilhögun nr. [95/2018](#)**

Breytt skilgreining á [pakkaferð](#) og innleiðing svokallaðrar [samtengdrar ferðatilhögunar](#) getur leitt til þess að ökutækjaleigur, sem bjóða viðbótarþjónustu, verði leyfis- og tryggingarskyldar sem ferðaskrifstofur. Bókun þjónustu á netinu leiðir oft til þess að til verður svokölluð samtengd ferðatilhögun, það getur til dæmis gerst ef gestur fær tilboð um kaup á viðbótar þjónustu við bókun eða með bókunarstaðfestingu. Því verða forsvarsmenn ökutækjaleiga að kynna sér nýja löggjöf vel, öðlast góðan skilning á þeim hugtökum sem þar eru notuð, og sækja um leyfi ef við á.

### **Lög um Ferðamálastofu**

Helstu breytingar eru lúta að leyfismálum, skyldu til að gera öryggisáætlanir og heimildum Ferðamálastofu til að leggja á dagsektir.

#### **Leyfismál**

Leyfi verða tvenns konar; [ferðaskrifstofuleyfi](#) og [leyfi sem ferðasali dagsferða](#), bókunarþjónustur leggjast af.

Ökutækjaleigur, sem bjóða aðra þjónustu en leigu ökutækja eða beina viðskiptavinum sínum í að kaupa aðra þjónustu, verða að skoða starfsemi sína út frá hinni nýju löggjöf.

Seljendur [pakkaferða](#), þ.e. [skipuleggjendur](#) og [smásalar](#), og þeir sem hafa milligöngu um [samtengda ferðatilhögun](#), verða leyfisskyldir sem ferðaskrifstofur og [tryggingarskyldir](#) skv. lögum um pakkaferðir og samtengda ferðatilhögun.

Hægt verður að sækja um leyfi samkvæmt nýrri löggjöf frá 1. janúar 2019.

#### **Öryggisáætlanir**

Öllum sem framkvæma eða hyggjast framkvæma [skipulagðar ferðir](#) innan íslensks yfirráðasvæðis verður, frá 1. janúar 2019, skylt að hafa skriflegar öryggisáætlanir, á íslensku og ensku, fyrir hverja tegund ferða. Óheimilt verður að bjóða ferð til sölu eða kynna á nokkurn hátt ef öryggisáætlun liggur ekki fyrir.

Leiðbeiningar varðandi öryggisáætlanir má nálgast á [vef Ferðamálastofu](#).

### **Lög um pakkaferðir og samtengda ferðatilhögun**

Með lögnum er tilskipun ESB um pakkaferðir og samtengda ferðatilhögun [nr. 2015/2302](#) innleidd í íslenskan rétt. Markmið laganna og tilskipunarinnar er aukin neytendavernd og eru skyldur þeirra sem selja [pakkaferðir](#) eða hafa milligöngu um [samtengda ferðatilhögun](#) skilgreindar í lögnum. Jafnframt er kveðið á um aukin réttindi ferðamanna.

Nauðsynlegt er að forsvarsmenn ökutækjaleiga, sem bjóða viðbótarþjónustu sem leiðir til leyfis og tryggingarskyldu samkvæmt nýrri löggjöf, kynni sér sérstaklega ákvæði laga [nr. 95/2018](#) um pakkaferðir og samtengda ferðatilhögun.

Ítarlegri upplýsingar um lagabreytingarnar er að finna á [vef Ferðamálastofu](#).

Akureyri 13. desember 2018

Starfsfólk Ferðamálastofu  
Stjórnsýslusvið - leyfisveitingar